

Il parlament vul salvar la «Lex Koller»

■ (sda/anr) Persunas da l'exteriur na duain er en l'avegnir betg pudair cumprar terren en Svizra u mo a moda limitada. En quest regard è il parlament perina. Ier ha il cussegl dals chantuns decidì sco segunda chombra da mantegnair la «Lex Koller». Il 2007 aveva il cussegl federal vulì abrogar la lescha. Il parlament aveva dentant pretendì mesiras accompagnantas uschia ch'ins ha spustà la fatschenta. Il 2012 ha la politica midà opiniun: Las duas chombras federalas han pretendì dal cussegl federal da mantegnair la «Lex Koller».

Dus arguments èn stads decisivs: la problematica da las abitaziuns secundaras e la crisa da finanzas che ha sveglià l'interess per terren en Svizra.

Sche la limitaziun per persunas estras vegniss abolida flessegiass bler capital da l'exteriur en las immobiglias svizras, ha scrit il cussegl federal.

Sco en il cussegl naziunal han ins exprimì ier er en il cussegl dals chantuns che la cumpra da terren svizzer sto restar resalvada a persunas che vivan e lavuran qua e che pajan taglia en Svizra.

Cussegliera federala *Simonetta Sommaruga* ha annunzià ier ina revisiun da la «Lex Koller» che stoppia vegnir modernisada ed adattada a las cundiziuns dad oz. Il 1983 è la lescha vegnida introducida per impedir ch'il terren svizzer vegnia pli e pli en mauns esters.